



大岳太和山誌卷之二

玄帝聖紀

玄帝稟天一之精惟務靜應不樂南面志復本

根降生之日即神農氏之末年歲在闕逢

敦辨釋甲午姑洗月三哉生明初曦馭天中

斡符天一之陽精托胎神化於翼軫婁三

宿之次龍變梵度天之下淨樂國善勝皇

后孕秀一十四月從左脇而生當生之時

瑞氣鬱葱異香充塞生而神靈甫及七歲

天文書契一覽默會潛心至道願事

上帝普福兆民欲尋幽谷內煉元真遂感

無極紫元君授以上道因指太和山而告之曰

此山自乾兌起脉盤旋五萬里水出震宮

上應翼軫二宿顯定極風太安皇崖二天

汝可居之當契太和飛昇復位上輔大道

與天地日月齊並告畢昇雲而去十五辭

父母父王不能抑其志遂入是山潛虛玄

一默會萬真身長九尺面如滿月龍眉鳳

目紺髮美髯顏如水清披松蘿之服散髮

跣足凝真養性四十二年成無上道出舊

誌

歷代御製

宋真宗天禧二年七月七日加號

真武詔曰伏以丕顯聰明聿求孚佑旌賁殊號
率循舊章恭惟真武之靈茂著陰方之位
妙功不測冲用潜通尹京邑之上腴有龜
蛇之見象允升地寶慈湧神泉自然清冷
飲之甘美資中國之利澤奏耳疾以蠲除
倍慶濟時虔思報德就其勝壤建以珍祠
既修奉於威容合登隆於稱讚爰稽懿實

永耀鴻禎真武將軍宜加號曰

鎮天真武靈應祐聖真君當體寅恭咸從布告

故茲昭示想宜知悉

仁宗嘉祐二年正月贊

真武曰萬物之祖盛德可委精貫玄天靈光有
焯興益之宗保合大同香火瞻敬五福攸

同

嘉祐四年正月上元日加號

玄帝曰太上紫皇天一真君王虛師相玄天上帝

加封水火二將

神龜曰同德佐理至應大道顯明武濟陰

威翌聖左正侍雲騎護國保寧輔肅玄初

太一天大左將軍

聖蛇曰同德佑理至惠誠重威慈普濟陽

辯武聖右正侍雲騎護國保靜輔肅守玄

太一天大右將軍

寧宗嘉泰二年十一月十四日崇封

真武誥曰仰止層霄巍乎北極瞻百神之環衛

有玄武之尊嚴顧像設之已崇而號名之
未備肇稱緝典以介蕃釐北極佑聖助順
真武靈應真君天之貴神國之明祀威靈
在上常如對於衣冠光景動人遂莫逢於
魑魅赫然祥異著于見聞在天禧時瑞表
醴泉之觀若熙寧日事傳大順之城祖宗
相繼禮文有加祠堂迺創於阜陵扁榜爰
新於佑聖肆朕尤嚴於祭報而神每監於
禱祈載惟矜蠶之孚曾靡窳寘之間福詒

冲眇將垂萬世之子孫德及高深溥洽四
方之黎庶誕揚盛美庸侈徽稱金闕玉京
密增於神筵雲車風馬永鎮於人寰尚冀
宴娛適觀薦饗可特加封

北極佑聖助順真武靈應福德真君

理宗寶祐五年二月崇封

真武誥曰北極惟尊玄元謂穹崇南面雖主百
神必嚴寅奉既陰受護持之貺宜顯加旌
賁之儀申衍榮章用昭敬事

北極佑聖助順真武靈應福德衍慶真君道周
六合威攝萬靈鍾元黃一炁之真陰功有
賴握坎離二精之妙神化無邊以茲蕩邪
而辟妖莫匪救民而護國惟我朝之累聖
殫至敬之一心在真廟仁廟則表靈應而
彰感通在孝皇寧皇則奉佑聖而崇福德
迨予眇冲固當增衍慶之封加爾聰明亦
既述均陽之讚盼嚮冥冥而默應威靈赫
赫以旁昭無願不成錫庶民之福祉何幽

弗察清四海之妖氛凡同普率之間均在
包含之內惟仁則所濟之博惟正則丕烈
之洪強贊上真難明至德尚宏道蔭永庇
人寰可特封

北極佑聖助順真武福德衍慶仁濟正烈真君
元成宗大德八年三月加封詔曰
上帝眷命

皇帝聖旨武當福地又屬職方靈應玄天宜崇
封典曠言

真武昔護先朝定都人馬之宮嘗現龜蛇之瑞
雖昭應已修於明祀而仙源未表於徽稱
爰命太常議行褒禮謂元者善之長聖德
合於一元聖則化而神元功同於三聖拯
濟民生而仁周宇宙廓清世運而威暢風
霆訂鴻名而既嘉宣寵光而何忝於戲天
道主宰謂之帝四季永鎮於山川帝室眷
命受於天萬年永安乎宗社思皇多祉祐
我無疆特加號曰

玄天元聖仁威上帝

仁宗延祐元年九月加封聖父詔曰

上天眷命

皇帝聖旨朕聞越有貴神是爲玄帝發祥大國
學道名山位鎮北方開皇家之景運威加
海內殄庶域之妖氛既昭報於純嘏宜推
尊於聖父元包有極所以融一炁之胚胎
慶衍真源所以綏萬年之祉祿庸加美號
用答殊休

聖父淨樂天君明真大帝可加封啓元隆慶天君明真大帝

加封聖母詔曰

上帝眷命

皇帝聖旨昔有上仙降生玄帝一死難名其妙用萬方咸仰其英威睟宇天臨顧洋洋而如在祥光日耀信赫赫以長存昌期既協於剖符大號宜加於鏤牒著母儀之特盛配父道之常尊聖躬有賴於擁全慈仁永

洽於帝祚益期昌熾福祿來仍

聖母善勝天后瓊真上仙可加封慈寧毓德天

后瓊真上仙

恭定帝恭定二年十二月封火神曰

上天眷命

皇帝聖旨咸秩無文異於灾旱寰輟有規一典也惟爾大神原於道家之說式著天關之名克相予守土之臣傷農閔雨使年穀以順成厥靈赫然於戲二氣良能以至誠而

有感百神受職宜定功以行封可封靈耀
將軍

封水神曰

上天眷命

皇帝聖旨建用皇極以協雨暘敬重明神而消
早暵感通一理也惟爾水神原於道家之
說於昭地軸之名克相予守土之臣傷農
閔雨使年穀以順成厥靈赫然於戲靡神
不舉用追跡於先王依人而行尚瞻懷於

下土可封靈濟將軍

國朝永樂十六年御製碑

蓋聞大而無迹之謂聖克周無窮妙不可
測之謂神是故行乎天地統乎陰陽出有
入無恍惚翕張驟日馭月鼓風駕霆倏而
爲雨忽而爲雲禦災捍患驅沴致祥調運
四時橐籥萬彙陶鑄群品以成化工者若
北極玄天上帝真武之神是已按道書神
本先天始炁五靈玄老大陰天一之化生

而神靈聰以知遠明以察微潛心念道志
契太虛乃入武當山修真內鍊心一志凝
遂感玉清元君授以無極上道功滿道備
乘龍天飛歸根復位顯名億劫與天地悠
久日月齊并武當舊名太和謂非玄武不
足以當之故名曰武當蟠踞八百餘里高
列七十二峯三十六巖之奇峭二十四澗
之幽邃峯之最高曰天柱境之最勝曰紫
霄南巖上出游氛下臨絕壑跨洞天之清

虛凌福地之深宵南巖皆有宮又自南巖
北下三十里有五龍宮又四十里抵山趾
有真慶宮俱爲祀神祝釐之所元末悉毀
於兵燹荆榛瓦礫廢而不舉天啓我國家
隆盛之基朕

皇考太祖高皇帝以一旅定天下神陰翊顯佑
靈明赫奕肆朕起義兵靖內難神輔相左
右風行霆擊其蹟甚著暨即位之初茂錫
景貺益加炫耀至若柳梅再實歲功屢成

嘉生駢臻灼有異徵朕夙夜祇念罔以報神之休仰惟

皇妣劬勞恩深昊天罔極以盡其報惟武當神之攸棲肅命臣工即五龍之東數十里勝地焉初建玄天玉虛宮於紫霄南巖五龍初建太玄紫霄宮大聖南巖宮與聖五龍宮又即天柱之頂冶銅爲殿飭以黃金範神之像享祀無極神宮仙館煥然維新經營之始至于告成之日神屢顯像祥光燭

霄山峯騰輝草木增色靈氣聚散變化無狀衆目咸覩跽拜喑喑柳梅垂實加前數倍九地啓秘金杵躍出陰陽著精玄質流潤靈異紛員莫能殫紀神之響應有如此者遂命道士爲提點主領各宮飭嚴祀事昭答神貺上資薦揚

皇考太祖高皇帝

皇妣孝慈高皇后在天之靈下爲天下臣庶祈迓繁祉雖然神之浮游混沌變化無方此

感彼應無往不之然非此無以達朕之誠
與夫天下虔敬之心也况山川冲和之氣
融結於斯與神相為表裏神之陟降往來
飄颻揮霍顧瞻舊遊豈不徘徊於斯乎則
是宮觀之建有不可無謹為文刻山中以
彰神功永永無窮焉

仁宗皇帝蟾宇歌

太初灑灑氣杳冥混沌肇判分清寧輕清
懸像濁成形二儀坎乾萬彙生孰網維是

道乃經二五之精妙合凝叅為三才入至

靈箇中孰能尤粹精滿然物外離塵縷若

人賦稟淑且清早歲學道棲岩壑葆和修

真久乃成虛室生白斯其徵皓如蟾魄涵

晶明放之六合彌光瑩歛之方寸何虧盈

抗志雲霞豈慕名和光時俗匪耽榮道積

厥躬聲乃宏奉祀大岳昭虔誠祝釐祚

國召嘉禎景星煌煌泰階平醴泉泠泠甘露

馨有時飛鳥來瑤京校讎玄文司權衡淋

滴金薤昭日星獻納承

恩道輿增玄門光顯揚休聲願言功行如月恒
峙看躡雲登蓬瀛
峙看躡雲登蓬瀛

仁宗皇帝即位祭真武文

維

洪熙元年歲次乙巳二月辛丑朔越十五

日乙卯

皇帝遣禮部左侍郎胡濙致祭于
北極真武之神曰惟

神道高玄妙功運化權廣濟生靈陰翊

皇度茲予嗣位之始虔修告祀伏惟

歆格永祚家邦尚

享

宣宗皇帝即位祭真武文

維

宣德元年歲次丙午十二月乙丑朔越十

一日乙亥

皇帝遣太常寺寺丞袁正安致祭于

北極真武之神曰惟

神參贊玄化顯相邦家我

皇祖崇建祠宮昭答

靈既茲予嗣位之初謹用祭告惟

神昭格茂錫靈休尚

享

英宗皇帝即位祭真武文

維

正統元年歲次丙辰正月丁卯朔越十五

日辛巳

皇帝遣平江伯陳佐致祭于

北極真武之神曰惟

神丕顯

靈化佑我家邦祛灾凝祥永世斯賴予嗣承大

統屬茲紀元之初敬用祭告用祈洪庥尚

享

景皇帝即位祭真武文

維

景泰元年歲次庚午閏正月丙午朔十五

日庚申

皇帝遣翰林院侍講徐瑄致祭于

北極真武之神曰惟

神丕顯

靈化佑我家邦祛災凝祥永世斯賴予嗣承大

統屬茲紀元之始敬用祭告用祈洪庥尚

享

英宗皇帝復即位祭真武文

維

天順元年歲次丁丑四月甲午朔越二十

日癸丑

皇帝遣定西侯蔣琬致祭于

北極真武之神曰惟

神玄元之化天一之尊爲世造福式顯神功佑

我邦家萬世永賴今予復正大位改元之

初敬用祭告尚祈

鴻庇保茲太平尚

享

憲宗皇帝即位祭真武文

維

成化元年歲次乙酉四月丁丑朔越二十

日辛丑

皇帝遣吏科左給事中沈璠致祭于

北極真武之神曰惟

神尊居坎位玄化無方護我國家威靈顯著今

予嗣承大統特用祭告

神其鑒佑永永無斁尚

享

憲宗皇帝紫霄宮神像記

朕聞自開天以來即有此山自元始以來即

有此神神乃北極玄天上帝真武是已山

乃大岳太和是已神非茲山無以爲棲真

之所山非茲神無以侈靈勝之名是故歷

代構造殿宇欽崇之不衰我

太祖高皇帝平定海宇惟神默相靈明赫奕嘗

於南京建廟奉祀之矣

太宗文皇帝肅靖內難惟神陰佑厥蹟誕著特於茲山大造宮祠及於北京復建行宮奉祀之矣

英考睿皇帝光復大位惟神屢現竒應亦既命官函香奠幣致敬尤篤朕繼紹大統十有五年仰思

先志敢不祇承矧家國乂安夷夏懷服無爲之治於斯爲盛豈不賴於神之翊贊而能爾

邪昭答之典在所必行肆命工爲像往安於太玄紫霄宮聖像一從官像四皆範銅爲之而鍍以金水火神二亦銅體金飭而各類其像供器香爐瓶盃鍾磬總十一事既聖既完載鮮載潔特遣太監陳喜送詣宮所奉安永享四方之香火永壯世人之觀瞻夫神分身降世變化無窮恍惚翕張出無入有禦灾捍患濟物度人數出禎祥祚我家國繼自今願丕揚神道幹運化機

俾上而

聖母福壽無窮于以昭朕之孝下而儲嗣繁衍
未艾于以昭朕之仁宮闈清吉于以昭朕
治內之嚴臣僚效忠于以昭朕使臣之禮
黔黎於變于以昭朕之化夷狄來王于以
昭朕之威以迄四時行百穀登群生遂化
工成庶乎神有感必應而朕虔奉之誠亦
不虛矣雖然朕之所望庇於神者豈止一
時如是而已哉謹爲文刻碑以彰神功於

不朽云

太和宮神像記

宮在均州南百二十里太和山天柱峯之
上乃我

皇高祖太宗文皇帝勅建以奉

北極玄天上帝真武之神之所也神向於此修
真得道神功威烈最爲顯著以故歷世往
徃建祠崇奉之不替方我

文祖肅清內難之初神每陰護顯相用寧邦家

大正九年山誌 卷三 六十一
是以

文祖感焉乃即神肇蹟之地弘構宮殿以爲崇奉之所者也而又於絕頂冶銅爲殿飾以黃金其崇奉之典萬古未有也暨朕嗣統君臨億兆十年于茲固由我

祖宗德澤流行

皇考

聖母教育所致然亦豈不陰有賴於神靈之贊祐歟茲欲昭答

神貺無以表誠乃命工範金爲像二堂安於大岳太和宮者真武聖像一從官像四皆銀爲之而間飾以金神帥十皆銅爲之而鍍以金又爲飾金雕鏤重簷木殿覆焉安於玄天玉虛宮者真武聖像一從官像四皆銅爲而金鍍之俱琢白石爲之座焉二堂水火以銀以銅各從其像殊漆梓金供卓各一其供器銀鍍金者十有四銅鍍金者二十有二總三十八事銅提爐二石磬一

大邑系誌 卷二 六十七
銅鍾一綺羅銷金幡幢傘并雜色幡總百
十有八特遣中官太監陳喜廖恭韋惲劉
斌右少監李本奉御藍富送詣宮所設齋
奉安永為瞻仰惟神陟降往來益著靈貺
儲祥錫福佑我國家俾朕上奉

慈闈萬年下延嗣胤千億內而宮壺協吉外
而邦國平寧近而黎庶乂安遠而蠻貊賓
服凡厥有生無不成遂庶有以副朕崇奉
之誠見神響應之妙也因紀以文用垂示

於文遠云

孝宗皇帝即位祭真武文

維

弘治元年歲次戊申四月甲午朔十二日

乙巳

皇帝遣陽武侯薛倫致祭于

北極真武之神曰惟

神尊居坎位玄化無方護我國家威靈顯著今

予嗣承大統特用祭告

神其鑒佑永永無斁尚
享

武宗皇帝即位祭真武文

維

正德元年歲次丙寅三月辛巳朔越二十
七日丁未

皇帝遣崇信伯費柱致祭于

北極真武之神曰惟

神尊居坎位玄化無方護我國家威靈顯著今

予嗣承大統特用祭告

神其鑒佑永永無斁尚

享

武宗皇帝告真武祈雨文

今歲已來雨暘愆候田苗枯槁黎庶憂惶
予心兢惕虔致禱祈惟神矜民旋斡太和
式調和氣以濟民艱庶民有豐稔之休神
亦享無窮之報

武宗皇帝告真武弭盜文

近歲以來群盜爲梗生靈被害在在有之
命將徂征稍臻平定餘災未殄尚累天和
水旱相仍妖祥疊見永思厥咎良切疚心
爰與群臣飭躬修政同期昭格庸迓
神庥伏冀神明憫茲黎庶轉災爲福綏我家
邦不勝惓惓懇禱之至

世宗皇帝即位祭真武文

維

嘉靖元年歲次壬午四月丁丑朔越二十

五日辛丑

皇帝遣工部右侍郎陳雍致祭于

北極真武之神曰惟

神尊居坎位玄化無方護我國家威靈顯著今

予嗣承大統特用祭告

神其鑒佑永永無斁尚

享

世宗皇帝重修宮殿祭謝真武文

維

嘉靖三十一年歲次壬子九月庚辰朔初

九日戊子

皇帝遣工部右侍郎陸杰致祭于

北極佑聖真君曰茲者奉修

玄聖宮宇屬當興工之始即感

神彰顯應圓光屢現敬仰

真麻謹用遣官祭

謝伏祈

聖真昭格永垂

庇祐錫慶邦家謹

告

世宗皇帝御製重修大岳太和山玄殿紀成之

碑

朕惟大岳太和山迺

北極玄天上帝修真顯化成道之所

帝以天一之精降靈人世感召天神授無極上

道丹成上昇歸祠之位瓊臺受冊功德巍

巍莫可殫述歷代崇封罔不闢神栖嚴祀

事肆我

成祖文皇帝惟

帝陰翊皇度赫有顯徵特勅隆平侯張信駙馬
都尉沐昕等率領官員軍夫人匠二十餘
萬建宮觀凡三十三處天柱峯冶銅爲殿
黃金飭之範金爲像置設精嚴落成勅名
爲大岳太和山其地之形勝與

神之靈蹟宮宇之宏壯載於

成祖御製碑文可攷也朕

皇考封藩郢邸實當太和靈脉蜿蜒之勝歲時
崇祀惟謹肆朕入承大統以來仰荷垂佑
游錫庶祥祗念

帝功報稱莫罄深慮歲久宮殿圯壞宜加修飭
爰發內帑申命部臣徃督其役以嘉靖壬
子年六月肇工於凡宮殿門廡齋堂藉以
妥靈而供祀者悉昂新之仍捐以坊額曰
治世玄岳經營之始即蒙

真光顯現瑞氣氤氳變化不一豈

帝昭靈貺以嘉答于誠故所應若斯之偉異歟
大工告成部臣具奏請朕文勒碑用垂永
久惟書有之類于

上帝禋于六宗望于山川禘于群神故岳鎮海
瀆在祀典有常秩奉妥有常宇維此大岳
特超中土峯嶺峻拔亘天關而盤地維信
爲仙聖所都而

帝護國翊運威靈顯彰致

祖宗建丕丕業既而定都幽燕位應玄冥是以

掃犁腥膻廓清華夏惟

神陰助風行霆擊天戈所臨無往弗蹟二百年
來民安國阜媿隆三五雖或一二氣數不
齊邊疆小警旋即殄遂至如庚戌內之大
奸每即禡殛豈尋常山之神能出雲雨捍
患災一節之功所可並者歟此神宇之修
嚴不可少懈也書曰鬼神無恒享于克誠
朕仰法

祖宗祇若明祀神之佑之庶其益加隆盛薰蒸

和氣覆育群生

宗社靈長山河鞏固則神其永永無疆惟朕躬亦荷無疆惟慶矣是用勒文于碑與天地而同其悠久云

嘉靖三十二年十月二十五日

今上皇帝即位祭真武文

維

隆慶元年歲次丁卯十一月壬子朔越二十一日壬申

皇帝遣尚寶司少卿徐現致祭于

北極真武之神曰惟

神尊居北極福德丕昭佑我

皇明夙彰靈應茲予嗣承大統特用祭告

神其歆鑒丕揚顯赫之靈永翊昌隆之祚尚享

今上皇帝即位祭真武文

維

萬曆元年歲次癸酉三月辛巳朔越二十

九日巳酉

皇帝遣工科都給事中吳文佳致祭于

北極真武之神曰惟

神尊居北極福德丕昭佑我

皇明夙彰靈應茲予嗣承大統特用祭告

神其歆鑒丕揚顯赫之靈永翊昌隆之祚尚

享

大岳太和山誌卷之二終

